

بسم الله الرحمن الرحيم



ISLAMSKA ZAJEDNICA U BOSNI I HERCEGOVINI
M U F T I L U K Z E N I Č K I
MEDŽLIS ISLAMSKE ZAJEDNICE TEŠANJ



GODINA XI
Broj: 2/39

BILTEN

april-juni 2015.g.
dž.-uhra-ram. 1436.h.g.

Istervno informativno glasilo Medžlisa IZ-e Tešanj

Svečano otvorena džamija u džematu Raduša - 13. 06. 2015.g. / 26. ša'bana 1436.h.g. – str. 4.



Džamiju otvario Husein ef. Mujčić



Obraćanje zamjenika reisu-l-uleme mr.Husein ef. Smajića

Javni programi – Obilježen „Dan šehida“ općine i 7. maj „Dan džamija“, ... str. 6.



Vukovo – 03. 05. 2015.- Mevlud za šehide



Miljanovci Novi – 07. 05. 2014.- Večer Kur'an-a

Odgov i obrazovanje – završena mektebska i školska godina (str. 5.);



Proglašenje pobjednika takmičenja iz mektebske nastave održanog 19. 04. 2015. u Tešnju



Pobjednici 11. općinskog takmičenja iz vjeronomjenske nastave održanog 18. 04. 2015. u OŠ „Kulin Ban“ Tešanjka

BAJRAM ŠERIF MUBAREK OLSUN

RAMAZANSKA PORUKA REISU-L-ULEME

U ime Allaha, Milostivog, Samilosnog.

Zahvaljujemo se Gospodaru svjetova na dobrima koja nam je dao i na milosti koju je na nas spustio u ovome životu; kao i na onoj kojom će nas obradovati na Ahiretu.

Salavat i selam upućujemo Njegovu miljeniku i poslaniku Muhammedu a.s.

Draga braćo i sestre,

Uzvišeni nas je pozvao da postimo, kako bismo bili bogobojazni i kako bismo našu vjeru upotpunili. Taj veličanstveni poziv mi dobrovoltno prihvatom danas poslije akšam namaza 1. ramazana 1436. Hidžretske godine, tj. 18. juna 2015. godine.

U slijedećih 29 dana ramazana potvrđivat ćemo našu opredijeljenost za slijedenje uzvišenih principa naše vjere, isključivo i jedino zbog Allahove odredbe da to činimo, nadajući se Njegovoj velikoj nagradi.

To je veliko dobro za nas, radost za naše duše, umorne od dunjalučkih briga, i odmor za tijela.

U ramazanu ćemo učiti Kur-an, uživati u milozvučju njegovih ajeta i diviti se mudrosti njegovih poruka. Obnovit ćemo i naše sjećanje na početke objave Kur-ana, prvi farz koji nam je izrečen: uči.

Prisjetit ćemo se i snage zajednice muslimana na Bedru i biti inspirirani da i mi tome jedinstvu težimo, srcem i dušom. U ramazanu ćemo osjetiti i djelić slasti oslobođenja i povratka domu, koji su osjetili prvi muhadžiri oslobađanjem Meke.

Braćo i sestre,

Neka nam svim ramazan prođe u predanim ibadetima i iskrenoj i dubokoj pobožnosti. Otvorimo svoja srca i u njih primimo blagodati ovoga mjeseca. Neka nam naša dobra djela budu putokazi u činjenju dobra našima najmilijima. Činimo sve što možemo da se zbližimo s našom braćom i sestrama, s našom rodbinom i prijateljima.

Pružimo ruku samlosti siromašnima i prognanim, nevoljnima i bolesnicima. Nemojmo zaboraviti da oni imaju svoj udio u onome što je nama Uzvišeni darovao.

Neka svjetlo ramazana obasja i naše džemate i našu zajednicu i neka nas ujedini u zajedništvu pravovjerja.

Želim puno ramazanskog dobra i bereketa muslimanima u Bosni i Hercegovini i Sandžaku, Hrvatskoj, Sloveniji, Srbiji i bošnjačkoj dijaspori.

Ramazan šerif mubarek olsun!

Aktivnosti IO Medžlisa –

02.04.2015. - Održana 3. redovna sjednica IO - u prostorijama Medžlisa IZ-e Tešanj na kojoj je razmatran dnevni red od 12 tačaka. Predsjedavao je predsjednik Zehrudin Kruško. Sjednici je prisustvovalo 12 članova IO. Usvojeni su: Zapisnik sa 2 redovne sjednice IO, Prijedlog programa takmičenja polaznika mektebske nastave i provođenja završnih ispita u mektebima, Prijedlog programa takmičenja iz nastavnog predmeta Islamska vjeronauka učenika VIII i IX razreda OŠ i I razreda srednjih škola, prijedlog Plana obilježavanja 7. maja „Dana džamija“, Informacije o aktivnostima Komisija IO, zaključci po prijedlozima džematskih odbora: Dobropolje-Mekiš – produžetak angažmana Dženis ef. Mulića, Dibekhana džamije i Jevadžija o pokretanju inicijativa za zamjenu krova Dibekhana džamije i uređenju vakufske kuće Jevadžije uz imenovanje građevinskih odbora, Imenovana komisija za ocjenjivanje imama, i zaključak o postavljanju sergije u džamijama za liječenje oboljelog džematlije iz Trepča.

11.06.2015. - Održana 4. redovna sjednica IO -

Na kojoj je razmatran dnevni red od 8 tačaka, prisustvovalo 14 članova. Predsjedavao predsjednik Zehrudin Kruško. Usvojeni su: Informacija o realizaciji zaključaka sa 3. sjednice, Izvještaji o: realizaciji Plana takmičenja i završnih ispita polaznika mektebske nastave, Plana takmičenja učenika iz vjeronauke, Plana obilježavanja 7. maja „Dana džamija“, te Plan aktivnosti za ramazan, prijedlozi zaključaka o nabavci stolica i prijedlozi komisija.

**POZIV NA SARADNUJU**

Esselamu alejkum, poštovani čitatelji!

Pred vama je novi broj Biltena Medžlisa IZ-e Tešanj. Ovo je još jedan naš pokušaj da damo skroman doprinos u prezentaciji našeg rada i aktivnosti i da ga približimo vama.

**Javite nam se sa vašim primjedbama i sugestijama kako bismo zajednički što bolje prezentovali naš Medžlis
Naša nova web stranica: www.miztesanj.ba ; email: iztesanj@bih.net.ba**

Bilten Medžlisa IZ-e Tešanj

Izdavač: Medžlis IZ-e Tešanj, za izdavača Zehrudin Kruško.

Glavni i odgovorni urednik: mr. Fuad ef. Omerbašić, tehnički urednik, tekst i foto Rašid Orlović
Redakcija: Salih ef. Haušić prof., Dževad ef. Hasanbašić prof., Enver ef. Kurtić prof., mr. Almir ef. Hadžić i Suljo ef. Djedović, saradnici imami MIZ-e Tešanj.

Hutba hafiza mr. Mensur ef. Malkića

Draga braćo i sestre, već smo u posljednjoj trećini mjeseca ramazana, u trećini koja je štit od džehennemske vatre, koja je selamet – spas, ako Bog da, za sve one koji dane ovog mubarek mjeseca provode u ibadetu Gospodaru svjetova. Ovo su najvredniji i najodabraniji dani u kojima je i noć Lejletul-Kadr – noć početka objave Kur'an-i kerima – blagoslovljena noć – noć za koju Allah dž.š., kaže – da je vrednija od hiljadu mjeseci.

S obzirom da nam je Muhammed, s.a.w.s., poručio u svojoj ramazanskoj hutbi: Vaš posao koji obavljate u ovom mjesecu, u mjesecu ramazanu, biće primljen kod Allaha dž.š..., ovo je prilika da se podsjetimo da Allah, dž.š., upravo u ovom mubarek mjesecu – naše ibadete, naša dobra djela i naše poslove – prima više i uvećava i nagrađuje bolje, nego u drugim mjesecima. Izvršenju Allahove, dž.š., naredbe: ... i zekat dijelite... (El-Muzzemmil, 20), to jest, izvršenju trećeg temelja vjere islam-a – zekata, najbolje je pristupiti u ovom mjesecu – što je već postalo uobičajeno u našoj praksi – mada se zekat može dati tokom cijele godine, ukoliko se ispune uvjeti propisani za njegovo davanje.

Stoga ćemo u današnjoj hutbi govoriti o zekatu – o čišćenju našeg imetka; o tuđem hakku – tuđem pravu unutar našeg imetka, kako nas Kur'an Časni uči; te ćemo se podsjetiti na ajete i hadise kojima nam se naređuje davanje zekata i koji nam objašnjavaju smisao i značaj ove vjerske obaveze. Ramazan je mjesec ibadeta, mjesec posta, mjesec namaza, mjesec Kur'ana, mjesec sadekatul-fitra i zekata.

U mjesecu ramazanu postom, naravno, uz namaz – čistimo naša tijela i naše duše; a zekatom – čistimo naše imetke, u kojima siromašni imaju svoje pravo; ali, u isto vrijeme, i zekatom čistimo i oplemenjujemo naše duše i naša srca. Uzvišeni Allah nareduje Muhammedu, s.a.w.s.: Uzmi od imetaka njihovih zekata, da ih njime očistiš i blagoslovjenim ih učiniš... (Et-Tewbe, 103) Musliman davanjem zekata svoje srce lijeći od škrnosti, tvrdičluka, od pohlepe i želje za gomilanjem imetka. On ne škrtarai kad su u pitanju prava drugih, imajući na umu činjenicu – da je imetak sebične osobe na ovom svijetu lišen blagoslova i bereketa, jer Allahov Poslanik, s.a.w.s., kaže: Nema dana u kome ljudi osvanu a da ne siđu dva meleka od kojih jedan govorí: Bože, nadoknadi onome ko dijeli, a drugi govorí – Bože, uništi onoga ko ne dijeli!

Uzvišeni Allah nas poziva: Dijeli, o čovječe, i Ja ћu tebi udijeliti! (Ahmed b. Hanbel) Imetke koje posjedujemo nisu naši – nego su Allahovi. Čovjek nije vlasnik imetka, vlasnik je Allah, dž.š., koji je Ganij – Onaj koji je Bogat i Neovisan, a čovjeku je imetak darovan i dat na korištenje. Čovjek je, dakle, nosilac, odnosno, čuvatog emaneta. Ukoliko je čovjek svjestan darovanog mu emaneta od Uzvišenog Gospodara, on se, kada vidi da je postao jak i bogat, neće osiliti, imetak neće rasipati, ali neće ni škrtariti, nego će umjeren biti.

Uzvišeni Allah, iz hikmeta – mudrosti samo Njemu znane, nekoga učini siromašnim a nekoga bogatim. Siromaštvo jeste iskušenje. Bogatstvo, pored toga što je blagodat i ono je iskušenje. Njime Uzvišeni Stvoritelj iskušava bogate – obavezom – da pomognu siromašne.

Zato je Allah, dž.š., propisao i učinio zekat jednim od pet temelja vjere i objasnio nam da se – pomažući druge – Njegovi robovi, kao i njihovi imeci zekatom čiste. Muhammed, s.a.w.s., nas poziva da udjelujemo od imetaka naših propisani procenat zekata i zaklinje se – da nam se nikada, zbog onog što smo udijelili imetak neće umanjiti; odnosno – da izdvojeni zekat nikada neće umanjiti imovinu, jer Allah, dž.š., spušta blagoslov i bereket na imetke onih koji udjeluju i Allah, dž.š., im udijeljeno iz Svoje opskrbe nadoknađuje: Što god udijelite, On će to nadoknadi, On najbolje opskrbuje. (Sebe, 39).

Imetak očišćen i oplemenjen zekatom – na takvim halal osnovama – raste, uvećava se, voljom Vlasnika svega i do sedam stotina puta i više, kako se ističe u Kur'an-i kerimu; dok vrijednost onoga što udijelimo može dostići težinu medinskog brda Uhud kako nam Muhammed, s.a.w.s., napominje u hadisu.

I pored jasnih naredbi za izdvajanjem i davanjem zekata, među vjernicima je znatan broj onih koji ne izvršavaju ovu obavezu. Onima koji ne izdvajaju zekatom propisani dio imovine, Allah, dž.š., će takvima, još na ovom svijetu, uskratiti Svoje blagodati, što možemo dokučiti, iz Poslanikovih riječi: Nijedan narod neće zanemariti obavezu davanja zekata a da Allah, dž.š., neće taj narod staviti na iskušenje glađu.

Ljudi nisu nikad zapostavili dijeljenje zekata od svoje imovine a da im Allah, dž.š., zbog toga nije uskratio kišu i da nije životinja kiša im nikada ne bi bila spuštena. Allah, dž.š., također, onima koji ne daju zekat navješće patnju i na budućem svijetu:...Onima koji zlato i srebro gomilaju i ne troše ga na Allahovom putu – navijesti bolnu patnju. (Et-Tevbe, 34) U ajetu, spomenuto trošenje imetka na Allahovom putu, odnosi se na izdvajanje i davanje zekata.

Dakle, savjesnim i redovnim davanjem zekata vjernik čuva svoj iman, osigurava svoj imetak od propasti i štiti sebe od nesreće i od ahiretske kazne. Davanjem zekata vjernik se zahvaljuje Milostivom na blagodatima kojima ga je darovao i učinio ga imućnim, dajući mu priliku da pomogne druge, koje Allah, dž.š., oskudicom i neimaštinom iskušava.

Zato je onaj koji daje zekat svjestan – da svojim zekatom direktno učestvuje u borbi protiv gladi i siromaštva, ali i u sprječavanju zavidnosti i razlike među bogatim i siromašnim; i da, na taj način, učestvuje i radi na širenju bratske ljubavi i solidarnosti – jer to što vjernik osjeća i pruža drugima – dajući zekat, njemu i njegovoj zajednici mnogo je značajnije, važnije i veće od samog dijela imovine koju je izdvojio i dao na ime zekata.

Zato je velika i značajna uloga zekata u formiranju i razvoju društvene svijesti i odgovornosti, samim tim, što institucijom zekata islam izgrađuje i pojedinca i zajednicu. Draga braćo i sestre! Zahvaljujući iskrenim i predanim vjernicima – u prošlim decenijama, smjelim i odvažnim muslimanima – zahvaljujući njihovim, često, izuzetno skromnim davanjima u vidu zekata i sadekatul-fitra, Islamska zajednica i njene odgojno-obrazovne institucije opstale su i egzistiraju na ovim našim prostorima.

Islamska zajednica je nastojala da ispoštuje nijet – namjeru bosanskohercegovačkih muslimana, vjernika i opravda njihova nastojanja, želje i očekivanja.

Izdvajajući zekat i sadekatul-fitru u Bejtul-mal njihova namjera i želja bila je da pomognu odgojno-obrazovne institucije Islamske zajednice: medrese, akademije, fakultete i tako doprinesu napretku svoje zajednice i svoga naroda, a samim tim, pomognu i unaprijede odgoj i obrazovanje svoje djece.

Zato je na nama danas da – slijedeći njihov primjer i izdvajajući zekat i sadekatul-fitru, za budući rad i egzistiranje ovih institucija – trasiramo put svojoj djeci, isto tako, kako su naši djedovi i očevi trasirali put kojim smo mi prošli. (...)

Svečano otvorena džamija u džematu Raduša – nastavak sa naslovne strane

U subotu 13. 06. 2015. godine, u prisustvu visoke delegacije IZ-e u Bosni i Hercegovini predvođene zamjenikom reisu-l-uleme mr. Husein ef. Smajićem, svečano je otvorena džamija u džematu Raduša. Džamiju je otvorio Husein ef. Mujčić, najstariji džematlija džemata Raduša, vakif zemljišta za izgradnju džamije, prvi imam u ovoj džamiji i otac šehida.

Program svečanog otvorenja započeo je u petak džuma namazom gdje je hutbu održao i džumu predvodio muftija zenički mr. Ejub ef. Dautović, a nastavljen mevludskim programom iza akšam namaza.

Mevlud su proučili imami medžlisa IZ-e Tešanj i susjednih medžlisa, a prisutnima se prigodno obratili džematski imam Ramo ef. Svrzo, glavni imam Medžlisa IZ-e Tešanj mr. Fuad ef. Omerbašić i direktor Uprave za vjerske poslove Rijaseta IZ-e u BiH mr. Nusret ef. Abdibegović, koji je uz čestitke u svom prigodnom nadahnutom obraćanju obuhvatio više pitanja od našeg porijeka od dobrih Bošnjana iz srednjovjekovne Bosne, preko pruzimanja emaneta i urođene čovjekove potrebe da vjeruje, načina spoznaje, bogobojsnosti, ramazanu i farzu jedinstva muslimana.

Nakon sjanog mevludskog programa i tople ljetne noći ispunjene mevludskim stihovima i tekbirima, Radušani su dan poslije dočekivali već u jutarnjim satima posjetioce iz drugih džemata i gradova. Svečani program otvorenja džamije počeo je 11:30 h.

Poslije proučenih ajeta iz Kur'ana hafiza Ahmed ef. Bukvića, prisutnima se obratio džematski imam Ramo ef. Svrzo prof., koji je kao domaćin izrazio dobrodošlicu zvanicama i svim prisutnim, pozivajući da program počne učenjem fatihe svim vakifima džamije koji su preselili, ali i šehidima, koji su dali svoje živote za odbranu vjere i BiH.

Džemat i osnovne podatke o džamiji predstavio je predsjednik Građevinskog odbora i organizacionog odbora za otvorenje džamije hadži Fuad Šišić: „*Džemat Raduša danas zvanično predaje Islamkoj zajednici u BiH sagrađenu džamiju. (...) Prvo je sagrađen mesdžid i stavljen u funkciju 1985.godine, a prva džuma klanjana 15. 04. 1988.godine, kada je uz mesdžid izgrađena i munara. U godinama poslije rata bilo je više akcija: od izgradnje vakufske kuće, proširenja harema, izgradnje i obnove drugih sadržaja do poslednje rekonstrukcije protekle godine. (...) Sudjelovanje u našim zajedničkim poslovima, bez nepotrebnih rasprava, bez razilaženja i svađa je mnogo vrednije od onog što vidimo*“.

Glavni imam Medžlisa Iz-e Tešanj, magistar Fuad ef. Omerbašić, u svom obraćanju izrazio je zadovoljstvo što mještani naselja Raduša nastavljaju svoj duhovni put rekonstrukcijom ove džamije zaključujući da se čovjek rađa u vremenu “*u kojem treba da nađe svoje mjesto i svoj potpuni angažman*” te da Radušani rekonstrukcijom džamije pokazuju da su pronašli svoje mjesto u vremenu i potpuni angažman.

Prisutnima se obratio i Općinski načelnik mr. Suad Huskić.

Mufija zenički, magistar Ejub ef. Dautović, je u svom obraćanju podsjetio prisutne da čuvaju svoja prava, i izvršavaju obaveze, te da u ovim danima preispitamo sebe, da se pripremimo i iskoristimo predstojeće dane ramazana.

Ulogu izaslanika reisu-l-uleme imao je rado viđen gost u svim džematima na području tešanskih Medžlisa zamjnek reisu-l-uleme mr. Husein ef. Smajić koji je u ime Islamske zajednice i reisu-l-uleme poselamio prisutne i čestitao Medžlisu Tešanj kao i džematu Raduša na prelijepoj džamiji. Svojim obraćanjem sa nizom poučnih primjera i poruka, kazao je kako džemat Raduša otvorenjem džamije na najbolji način izražava dobrodošlicu mjesecu ramazanu.

Završno ašere proučio je hfz. Nermin ef. Ibrahimović, a dovu muftija mr. Ejub ef. Dautović. Poslije proučene dove predsjednik IO Medžlisa IZ-e Tešanj Zehrudin Kruško je uručio ključeve džamije zamjeniku reisu-l-uleme koji je džamiju proglašio vlasništvom IZ-e u BiH i uručio ključeve džamije Husein ef. Mujčiću koji je, uz tekture, svečano otvorio džamiju.

Džemat Raduša je jedan od većih džemata na području medžlisa IZ-e Tešanj, sastoji se od nekoliko mahala od kojih se neke spominju još iz doba Osmanlija (Bejtici, Hadžimehići, Mešići) kada su postojala dva mekteba i to u Bejticiima i Mešićima od kojih u Bejticiima i danas postoji i u funkciji je.

Ovaj džemat je bio u sastavu džemata Tešanj do 1988.g., mada je jedno kratko vrijeme egzistirao kao samostalan džemat i to u periodu 1928. - 1929. godine kod uvođenje imamata, a kako mu je sjedište bilo u Tešnju u Šarenom mektebu (objekat muške mektebiibtidajje) Rješenjem reisu-l-uleme isti je „reduciuran”.



Hutba na džumi – Muftija zenički



Mevlud – Obraćanje mr. Abdibegovića



Otvorenje – Obraćanje hadži Šišića

„Odgoj i obrazovanje kroz mekteb i školu“

Završnim isptima, podjelom mektebskih knjižica i hatma dovama polaznika mektebske nastave okončana je mektebska 2014/15. godina na području Medžlisa IZ-e Tešanj.

Takmičenje polaznika mektebske nastave na nivou Medžlisa održano je 19. aprila 2015. godine iz tri kategorije: opće znanje, kiraet mlađi uzrast i kiraet stariji uzrast sa učešćem po jednog takmičara po kategoriji iz svakog mekteba. Ukupno učestvovalo 99 takmičara.

Pobjednici su: iz općeg znanja **1. mjesto Bašić Refik iz džemata Jablanica**, 2. mjesto Taqi Amina iz džemata Jelah i 3. mjesto Djedović Ensar iz dežmata Oraš Planje.

Iz kiraeta – mlađi uzrast pobjednici su: **1. mjesto Dizdarević Sara iz Šarenog mekteba**, 2. mjesto Salkanović Muhamed iz džemata Šije Donje Polje i 3. mjesto Omerović Amina iz džemata Oraš Planje.

Iz kiraeta – stariji uzrast pobjednici su: **1. mjesto Sprečak Mustafa iz džemata Vukovo**, 2. mjesto Solo Hamdo iz džemata Piljužići i 3. mjesto Muminović Mehmed iz džemata Hamzibegove džamije. Ukupni pobjednici po džematima su: 1. mjesto džemat Oraš Planje, 2. mjesto džemat Jelah i 3. mjesto džemat Vukovo.

Pobjednici – prvoplasirani iz svih kategorija učestvovali su na takmičenju nivoa muftiluka zeničkog održanom 10.05. 2015. godine u Zavidovićima na kome su zauzeli ukupno 2. mjesto a pojedinačno: Mustafa Sprečak 1. mjesto, Sara Dizdarević i Refik Bašić 3. mjesto. Mustafa Sprečak je predstavljao Medžlis i Muftiluk na finalnom takmičenju nivoa Rijaseta odžanom u Sarajevu 25. maja na kome je zauzeo 5. mjesto.

Završni ispti polaznika mektebske nastave provedeni su u svim mektebima u periodu od 09.05.-06.06.2015. godine. Od 3320 upisanih polaznika prisustvovalo je 2599 (78,28%). Od ukupnog broja upisanih tokom godine je u sufari učilo 919 polaznika, a u Kur'anu 1086 od kojih je njih 807 završilo hatmu.

Sportski susreti – 16. sportski susreti „Mekteb 2015“ održani su u 31. 05. 2015. godine na stadionu „Luke“ FK TOŠK Tešanj. Na sportskim susretima učestvovali su svi mektebi sa po 10 polaznika, a takmičenje je provedeno u tri discipline: mali nogomet, trčanje na 100 metara i skok u dalj. Pobjednici takmičenja su: u malom nogometu 1. mjesto ekipa mekteba Vukovo, 2. mjesto ekipa mekteba Bukva i 3. mjesto ekipa mekteba Šarani mekteb; u trčanju na 100 metara: Kruškić Benjamin iz Šarenog mekteba, 2. mjesto Hrnjić Selimir iz mekteba Bobare i 3. mjesto Ramić Ahmed iz mektene Hamzibegove džamije; u skoku u dalj: 1. mjesto Smajić Armel iz džemata Miljanovci, 2. mjesto Krkalić Muhamed iz džemata Lepenica i 3. mjesto Halvadžić Ajdin iz džemata Karadaglije-Koprivci-Oruče.

Podsjećamo da prošle godine nisu održani sportski susreti zbog organizacije pomoći nastrandalim od poplava i klizišta.


Mektebske knjižice – uručeni se svim upisanim polaznicima u subotu 06.06.2015. godine.

Hatma dove polaznika mektebske nastave do izrade ovog izvještaja održane su u 26 džemata na kojima su svim svršenicima hatmi uručene jedinstvene svjedožbe izrađene u Rijasetu i popunjene u medžlisu, ukupno uručena 807 svjedodžba.

Od mogućih 9.240 bodova mektebi su osvojili 6.369 bod odnosno 68,93%.

Nakon sumiranja svih rezultata i ocjene glavnog imama najbolje rezultate u mektebskoj 2014/15. godini na području ovog Medžlisa postigli su:

1. Jelah – muallim mr. Almir ef. Hadžić i Vukovo – muallim Mirnes ef. Alić,
2. Oraš Planje – muallim Suljo ef. Djedović prof.,
3. Šareni mekteb sa 3 muallima - muallimi hfz. Nermin ef. Ibrahimović prof., mr. Enver ef. Kurtić i Amar ef. Bedaković prof.,
4. Mrkotić-Putešić – muallim Hajrudin ef. Delić,
5. Miljanovci – muallim Raif ef. Hasak prof..



Sprečak Mustafa

Mektebi koji su postigli loše rezultate su: Dobropolje-Mekiš, Šije Gornje Polje i Avdipašina džamija.

VJERONAUKA U ŠKOLI - I ove školske godine su vjeronaukom obuhvaćeni svi razredi u osnovnim i srednjim školama na području Medžlisa IZ-e Tešanj. U osnovnim školama na nastavi Islamske vjeronauke prisutno je bilo 99% učenika, a u srednjim školama 97%. Vjeronuku u OŠ izvodilo je 22 nastavnika, a u srednjim školama 5 profesora Islamske vjeronauke.

Ovogodišnje, 11. za redom, općinsko takmičenje učenika OŠ i 3.srednjih škola iz Islamske vjeronauke održano je u organizaciji Medžlisa IZ-e Tešanj u OŠ „Kulin Ban“ Tešanjka 18.04.2015. Pobjednici takmičenja bili su:

VIII—Razred - 1. mjesto – Mević Asija – iz OŠ „A. V. Ilhamija“ Kalošević,

2. mjesto – Mehinović Nadina – OŠ „Kulin Ban“ Tešanjka,
3. mjesto – Mehinović Neira - OŠ „Kulin Ban“ Tešanjka.

Solo Zekija



IX- Razred - 1. mjesto – Solo Zekija– OŠ „1. mart“ Jelah,

2. mjesto – Muminović Elma – OŠ „Kulin Ban“ Tešanjka,
3. mjesto – Begović Ajla – OŠ „Kulin Ban“ Tešanjka.

I- Razred - srednjih škola: 1. mjesto – Kruško Aldin- srednja tehnička školam ,

2. mjesto Kovačević Aldina – Mješovita srednja šola i 3. mjesto Bobarić Azelma – gimnazija „M.Č. Ćatić“.

Prvoplasirani takmičari učestvovali su na takmičenju Muftiluka zeničkog održanog 09. 05.2015. u Kamenici (MIZ Teslić) i zauzeli: **Zekija Solo – 1. mjesto**, Asija Mević 2. mjesto. Ukupno 2.- mjesto.

Zekija Solo učestvovala na 4. takmičenju nivoa Rijaseta i osvojila **2. mjesto**.

Obilježen 7. maj „Dan džamija“ na području Medžlisa IZ-e Tešanj, izdvajamo...

1. - 22.04.2015. g. - Održana, **tribina za žene u džamiji Miljanovci Novi** poslije akšam namaza. Temu „Komunikološki aspekt u očuvanju bošnjačke porodice“ prezentirala mr. Sumea Ljevaković-Subašić.

2. - 26.04.2015. g. - Održan **omladinski turnir u stonom tenisu u džematu Miljanovci Novi** – Dom kulture, poslije podne namaza. Učestvovali omladinci iz džemata, a pobjednici su: 1. mjesto – Kenan Mujkić iz džemata Miljanovci, 2. mjesto – Ismet Smajić iz džemata Miljanovci Novi i 3. mjesto Alem Mešić iz džemata Tešanjka. Ovo je druga godina kako se organizuje ovaj turnir.

3. - 30.04.2015. godine - **Održan tradicionalni 13. mevlud za šehide u džamiji džemata Mrkotić-Putešić** poslije akšam namaza,a u povodu 7. maja i dana formiranja čete Mrkotić. Prigodan program (učenje Kur'ana, mevluda, ilahija, predavanja, prezentacije i dova) proučili su imami okolnih džemata i polaznici mektebske nastave ovog džemata, uz obraćanje glavnog imama Medžlisa IZ-e Tešanj mr. Fuad ef. Omerbašića.

U toku programa prisutnima je na velikom ekranu prezentiran ratni put čete Mrkotić i podjećanje na lik svih šehida ovog džemata.

4. - 01.05.2015.g. – Održana **tematska hutba** u svim džamijama, autora Sulje ef. Djedovića.

5. - 01.05.2015. g.- U svim džamijama postavljena **sergija za izgradnju džamije i islamskog centra u Gracu** – prikupljeno i uplaćeno na račun Rijaseta 6.488,35 KM.

6. - 03.05.2015.- g. Održan **tradicionalni 20. mevlud za šehide u džamiji džemata Vukovo**, koji zajedno svake godine organizuju Medžlis IZ-e Tešanj i OPŠiPB. Prigodan program (učenje Kur'ana, mevluda, slavata, ilahija, predavanja i dove) proučili su imami Medžlisa IZ-e Tešanj, a prisutnima su se prigodno obratili glavni imam Medžlisa IZ-e Tešanj mr. Fuad ef. Omerbašić, džematski imam Mirnes ef. Alić i predsjednica OPŠiPB Tešanj Nura Mehić.

7. - 03.05.2015. - **Promovisano 17 polaznika mektebske nastave u hafize sure Jasin u džematu Miljanovci Novi.**

Promociji je prisustvovao i glavni imam Medžlisa IZ-e Tešanj koji je čestitao muallimu i polaznicima, a nakon proglašenje troje najboljih uručio pripadajuće nagrade kako pobjednicima tako i ostalim učesnicima. Najbolji su bili: 1. Mujkanović Medina, 2. Mujkanović Ajdin, 3. Kruško Ahmed.



Pobjednici turnira u stonom tenisu



Mevlud u Mrkotiću



Mevlud u Vukovu

8. - 06.05.2015.g. - **U atriju Medžlisa IZ-e Tešanj održana je promocija filma „Tešanske džamije“ i knjige „Džamija na Igmanu“** sa početkom u 19,00 sati. Glavni imam Medžlisa IZ-e Tešanj mr. Fuad ef. Omerbašić kao moderator je na početku naveo da se program sastoji iz dva dijela: u prvom dijelu je projekcija filma „Tešanske džamije“ kao nastavak projekta iz 2010. godine kada je objavljena brošura „Tešanske džamije“, a u drugom dijelu je promocija knjige „Džamija na Igmanu“. Film „Tešanske džamije“ je sniman dronom iz zraka i njim su obuhvaćene sve tešanske džamije (38).

U promociji knjige „Džamija na Igmanu“ učestvovali su promotori: mr. Sakib Kurtić, dr. Ferid Dautović, glavni imam Medžlisa IZ-e Sarajevo, muftija zenički mr. Ejub ef. Dautović i autor Sead Rujanac.

9. - 07.05.2015. godine – **Tradicionalno centralna manifestacija Medžlisa IZ-e Tešanj u povodu 7. maja „Dana džamija“ održava se u džamiji džemata Miljanovci Novi kao „Večer Kur'ana“.** Ova manifestacija je poprimila internacionalni karakter jer u njoj učestvuju hafizi iz više zemalja. Na ovogodišnjoj manifestaciji Kur'an Časni su učili kurra hafizi iz Turske i Hrvatske: Jašar Čuhadar, Mehmet Fevzi Unal i Aziz Alili, a prisutnima se prigodno obratili džematski imam Bersad ef. Kozlić prof., glavni imam Medžlisa IZ-e Tešanj mr. Fuad ef. Omerbašić, dr. hafiz Kenan Musić, Ataše za vjerska pitanja pri Turskoj ambasadi u BiH Hasan Atl – na Bosanskom jeziku, i Muftija zenički mr. Ejub ef. Dautović.

10. - 08.05.2015. godine – U svim džamijama održana tematska hutba i pročitana poruka reisu-l-uleme.



Promocija filma i knjige



Večer Kur'ana

Manifestacije, događaji, iz naših džemata...

Jelah – Obilježen dan vakifa i uručene vakufname vakifima za uvakufljena novčana sredstva za temeljitu rekonstrukciju džamije. Jasen pred duše umrlih vakifa i dovu proučili su imami, a prisutnima su se obratili: džematski imam mr. Almir ef. Hadžić, glavni imam mr. Fuad ef. Omerbašić i Muftija zenički mr. Ejub ef. Dautović. Vakufname su uručili: predsjednik IO Zehrudin Kruško, glavni imam i Mufija zenički koji je uručio i posebno priznanje Vahidu Festi za organizaciju svečanog otvorenja džamije.



Novo Selo - Završeni radovi na renoviranu vakufske kuće - u periodu od 1. maja do 15. juna. Postavljena je nova je vanjska i unutarnja stolarija, vanjska i unutrnja fasada, glazure (estrih), instalirano centralno grijanje, predulaz i nova soba u potkrovnom dijelu: Ukupna investicija oko 20.000,00 KM.



Tešanj; uručeni trimeri džematima - 16. 05. 2015. g.u prostorijama Medžlisa IZ-e Tešanj predsjednicima džematskih odbora sa područja ovog Medžlisa uručeni su trimeri (35) sa pratećim po 5 litara goriva – vakuf firme „HIFA OIL“ Tešanj.



Tešanj - U okviru manifestacije „Tešansko proljeće“ u petak 24. 04. 2015. godine u Centru za kulturu Tešanj održana promocija knige „Islamski identitet Evrope“, autora akademika Ferida Muhića. Promotori su bili dr. Dželal Ibraković i mr. Fuad ef. Omerbašić, a moderator Amir Brka, direktor Centra za kulturu Tešanj, na kraju se prisutnima obratio i sam autor.



Tešanj – Harman džamija – 16. 06. 2015. g. završeni radovi na ograđivanju „Terzića,“ mezarja, uređenju i krečenju džamije te postavljanju novog centralnog lustera u džamiji.

**II – POSJETE MEDŽLISU**

Zlatni ljiljani - 06.04.2015.U okviru ovogodišnjeg druženja dobitnika najviših ratnih priznanja Federacije BiH, ZDK i 7 – Jug.



Premijer Galijašević sa ministrima ZD Kantona - u okviru obilježavanja 15. maja Dana policije ZDK čiji je centralni program održan u Tešnju.



Muftija zenički – 24.04.2015. g.
Delegacije: Medžlisa Tuzla, 28.05.
Bosanska Dubica – 02.06.,2015. i
Bugojno – 11.06.2015.



Fuad ef. Omerbašić bedel za Nezir Omerbašić	Mirnes ef. Alić bedel za Kantić Rasim-Hajrudin	Hadžđi i imena Alaha radi žuravajući HADŽIJE MEDŽLISA IZ-e TEŠANJ 2015./1436.				
Roša Mustafa Čaglići	Sejadić Smajo Čaglići	Subašić Halim Jelah	Pilav Jusuf Jelah Polje	Kruško Mustafa Novi Miljanovci	Halilović Mustafa- Koprivci	Hadžinujić Muhammed Tešanj
Sadiković Smajl- Mračaj	Alić Kasim i Samila Jelah		Hujdur Ahmet i Zahira Jelah		Bekrić Senad i Senija Lepenica	
Turkeš Kasim i Hava Tešanj	Unkić Faruk i Ferida Tešanj		Unkić Suljо i Ramiza Mrkotić		Kurdić Halima Bobare	
Kikić Mensur i Izeta Jelah	Mudrov Ismet i Sefija Piljužići		Mudrov Vahid i Fatima Piljužići		Svrzo Fatima Drinčići	
Džihic Ismail O. Planje	Hfz. Alimir ef. Šalkanović i Alma Šije		Sejdinović Abdulah i Mejra Šije		Subašić Zulejha Jelah	Piro Badema Dž. Planje
						Mahmutović Mirsad i Fata Raduša (Nema saglasnosti za fotografiju)
Hadžanović Safida Ljetinić	Omerović Melva Potočani	Lekić Mejra Miljanovci	Ahmić Rezija Miljanovci	Begović Fatima Mračaj-Potočani	Ahmić Rasima -Jelah Bedel za Ahmić Ibro	

U toku je prikupljanje dokumentacije za Omerbašić Hazima i Sabihu iz džemata Jelah.
 Sve hadžije prijavljene putem Medžlisa IZ-e Tešanj - putuju avionom u organizaciji Rijaseta IZ-e u BiH.